

萬有文庫

第一集一千種

王雲五主編

明詩別裁

(二)

沈德潛 周準 選

商務印書館發行



明詩別裁

(二)

沈德潛 周準 選

國學基本叢書

萬有文庫

第一集一千種

總編纂者

王雲五

商務印書館發行

編主五雲王
庫文有萬

種千一集一第

裁別詩明

冊二

選準周 潛德沈

號一〇五路山寶海上

五雲王

人行發

路山寶海上

館書印務商

所刷印

埠各及海上

館書印務商

所行發

版初月十年九十國民華中

究必印翻權作著有書此

The Complete Library

Edited by
Y. W. WONG

MING SHIH PIEH TSAI

SELECTED BY CHEN TÊ T'SIEN AND CHOW CHUN

PUBLISHED BY Y. W. WONG

THE COMMERCIAL PRESS, LTD.

Shanghai, China

1930

All Rights Reserved

明詩別裁

卷七

高叔嗣

叔嗣字子業，祥符人。嘉靖癸未進士，官至湖廣按察使。○蘇門五言，沖淡得掌。蘇州體，王元美評云：如高山鼓琴，沉思忽往，木葉盡脫，石氣自青，良然。○王敬美云：徐昌穀高子業二君，詩有不同，而皆巧於用短，徐以高韻勝，高以深情勝，更千百年，李何有時廢興，二君必無絕響。

再調考功作

引疾三上書，微願不克諧。徒官復在茲，心迹一何乖。軒裳日待旦，閭閻凌雲排。入屬金馬籍，出與羣龍偕。積賤詎有基，履榮誠無階。但惜平生節，逾久浸沉埋。既妨來者途，誰明去矣懷。鳥迷思故林，水落存舊涯。惟當尋素業，歸臥守荆柴。謹微葆真，不躁進，不妨賢，卓然想其風槩。○入理不腐，善學大謝。

古歌

荆和當路泣，良璞爲誰明。茫然大楚國，白日失兼城。燕石十襲重，魚目一笑輕。古來多感歎，今予益吞聲。

敘懷

伊昔追弱冠，奮足參賢豪。衣褐出下國，脫輓造中朝。聖期開九五，河清在一朝。升龍假玄淵，鳴鳳託芳條。五從宰府辟，連荷公叔招。名過有瑕類，道在無矜驕。猶全不肖軀，解冕未逍遙。

答谷司僕見問

幸自返中園。非關逃微祿。方因疾病餘。黽勉供樵牧。春至東郭田。夏來北林木。時從遠原上。日縱平郊目。野老逢與言。道書間能讀。何能共世人。無事相追逐。勞君問出處。日暮掩茅屋。

簡袁永之獄中

本同江海人。俱爲軒冕誤。子抱无妄憂。余有多言懼。昔來始青陽。今此已白露。豈乏速進階。苟得非予慕。罪至欲何言。直以愚情故。衆女競中閨。獨退反成怒。追誦古時人。蒙冤誰能訴。皇心肯照微。與子齊歸路。

病起偶題

空齋晨起坐。懽遊罷不適。微雨東方來。陰靄條終夕。久臥不知春。茫然怨行役。故園芳草色。惆悵今如積。

送別德兆武選放歸

燕郊秋已甚。木葉亂紛紛。失路還爲客。他鄉獨送君。罷歸時共惜。棄置古常聞。莫作空山臥。令人望白雲。

分水嶺晚行

客興日無奈。兵荒歲屢加。少年曾許國。多難更移家。遠水通春騎。孤城起暮笳。憑高一回首。何處是京華。

寒食定興道中

二月鶯花少。千家雨雪霏。可憐值寒食。猶未換征衣。積水生空霧。高城背落暉。忍看楊柳色。從此去王畿。

徐

階字子升華亭人嘉靖癸未賜進士第累官少師吏部尙書贈太師諡文貞

送司封仲芳楊子赴留都

哲人重道義。朝貴不足縻。丈夫志四方。遠適非所悲。如何與子別。悵悵不忍辭。古道日淪替。羣諛紛追隨。子獨諒迂僻。經訓相劇規。去住忽以異。麗澤安所資。頽波無停流。靈耀亦西馳。感此重念子。何以慰爾知。至理不外得。吾心實吾師。願言勵操存。千里同襟期。

橫溪爲彭允禎賦

橫溪東去水迢迢。虛閣重簷共寂寥。山外夕陽低度鳥。雨餘春渚暗通潮。寒空落葉書聲靜。秋草孤帆客夢遙。欲徙石湖湖上石。爲君乘月更吹簫。

鄭

旦字希周歙縣人嘉靖癸未進士官至浙江右布政使

曉發洱海夕次濱川

天高野曠瘴煙收。風急霜繁落木秋。箐道千盤臨戍堡。山城百雉入邊州。諸蕃樂歲休戎馬。孤館頻年望斗牛。夜半角聲吹激烈。紛紛涼月照人愁。

張時徹

時徹字唯靜鄞縣人嘉靖癸未進士官至南京兵部尙書

采葛篇

種葛南山下。春風吹葛長。二月吹葛綠。八月吹葛黃。腰鎌逝采掇。織作君衣裳。經以長相憶。緯以思不忘。出入君篋笥。長得近輝光。層冰布河水中野。皓凝霜。吳羅五文采。蜀錦雙鴛鴦。君恩當斷絕。歎息摧中腸。中腸日以摧。葛葉日以衰。願留枯根株。化作萱草枝。古樂府語意

初秋

一聲漁唱海天秋。素練初飛白鷺洲。亦有芙蓉自開落。何人解識漢宮愁。

蘇

祐字允吉。濮州人。嘉靖丙戌進士。官至兵部左侍郎。宣大總督。

九日

落木驚風候。淹留感歲華。陰雲連紫塞。清淚對黃花。八駿周京馬。孤蓬漢使槎。高臺予懶上。不爲苦思家。予告歸入倒馬關作

南風吹雨傍關來。關上千峯畫角哀。老去尙憐金甲在。生還重見玉門開。鵝絃謾引思歸調。虎節空慚上將才。聖主恩深何以報。車前部曲重徘徊。

塞下曲

將軍營外月輪高。獵獵西風吹戰袍。聲繁無聲河漢轉。露華霜氣滿弓刀。

華

察院○學士字潛。無錫人。嘉靖丙戌進士。官至侍讀學士。掌南

秋日觀稼樓曉望

日出天氣清。山中悵幽獨。登高一眺望。風物淒以肅。流水映郊扉。炊煙散林屋。秋原一何曠。薄陰翳荒竹。時聞鳥雀喧。因念禾黍熟。悠悠沮溺心。千載猶在目。王摩詰云。雀喧禾黍熟。此衍作十字。便不及古人。

宿玉陽山房

返照明溪梁。深松晦夕景。巖臥符夙期。雲陰石牀冷。因投物外心。遂入清虛境。天寒木葉疎。月照山房靜。然燈獨不寐。秋宵一何永。明發從此辭。白雲鎖蒼嶺。

游善卷碧仙巖

落日下空門。齋鐘出林莽。偶茲叩精廬。再宿翠微上。舊游不知處。但見松杉長。巖虛露氣清。坐覺心魂爽。月白山窗高。夜靜風泉響。遂令寤寐中。超然脫塵網。雲壑永棲遲。願言稅歸鞅。

五月望夜與諸君山中再酌

仲夏苦晝永。薰風起將夕。圓景海上來。照此山中客。坐令微暑消。兼使衆累釋。興至時命觴。露下復移席。因就水竹居。遂同魚鳥跡。盤遊豈忘返。翫物聊自適。臺空人影疎。夜靜潭氣白。參差樹杪峯。歷歷辨咫尺。超然悟真境。萬物一虛寂。

山臺曉望懷王僅初不至

初日照臺上，興來成獨遊。天高宿霧盡，木落空山秋。曉色侵殘鬢，新寒上故裘。吳門隔煙水，悵望空悠悠。

惠山寺與施子羽話別

看山不覺暝，月出禪林幽。夜靜見空色，身閑忘去留。疎鐘隔雲度，殘葉映泉流。此地欲爲別，諸天生暮愁。

夜靜見空色五字入微然鍾譚專取此種便與詩道日遠

陸

粲字子餘長洲人嘉靖丙戌進士官工科給事中坐劾張桂謫都勻驛丞遷知永新縣

贈別王直夫

威鳳天際翔，潛虬澤中蟠。嚴子時閉肆，貢公乃彈冠。顯晦豈必同，各以性所安。子行樹遠績，奮身青雲端。

鄙人棲蓬蒿，蹇拙聊自完。丈夫志千載，飛沉何足歎。相期保貞素，歲晚同金蘭。

袁

袞字永之吳縣人嘉靖丙戌進士官刑部主事謫戍湖州後用薦起官至廣西提學僉事

送陳德夫使魯

帝曰封同姓，皇華遣使臣。河山藏漢誓，寶玉展周親。殿說靈光古，經傳孔壁新。余生好文獻，一爲訪先民。

自柳至平樂道中書事

遠觸蒼梧瘴，初乘灘水槎。蝮蛇晴掛樹，射蜮晝含沙。屋覆湘君竹，山開蜀帝花。夷堅收未盡，博物待張華。

大駕視牲南郊

大路調仙馭。朱旗列禁城。帝牛三月繫。田燭九衢明。日並龍旒出。山將彩仗迎。橫汾卑漢詠。禋祀達皇情。

秋興

仙仗行宮舊內居。花間往往駐鸞輿。徒聞漢帝橫汾曲。不見長卿諫獵書。天子射蛟開水殿。奚官牧馬遍郊墟。兼葭苒蒨秋無限。悵望煙雲萬里餘。

王慎中

慎中字道思。晉江人。嘉靖丙戌進士。官至河南參政。○遵應以古文傳。然五言古亦窺顏謝堂廡。無一淺語滑語。

登金山口絕頂

地紀控西界。靈山巨北旬。足弱步履憊。崖峭石猶踐。枝樛迺能援。葛脆不可挽。當其意象開。豈復慮高蹇。瞻峰皆崩施。陟澗數迴緬。稍覺天地寬。卽看雲煙變。石竇芝自榮。林罅雪尙泫。興闕無近尋。登高有遠見。周圻矗五雲。易水通一線。微茫燕趙區。歷歷皆可辨。長嘯發靈籟。倦坐席苔蘚。氛垢苟不嬰。沉慮斯可遣。

遊白鹿洞

素嬰邱壑情。况秉英賢想。寤寐懸宿心。遊盤得茲賞。重陰始晦蒙。杲杲旋開朗。攬勝據巉巖。探奇歷榛莽。境閑百慮空。意愜二儀廣。野色浮巾衣。秋容成物象。菊含露下英。泉作山中響。柔葉稍朝零。剛條非夏長。景物易流徙。今古同俯仰。躊躇悵回軫。何時還獨往。

遊麻姑山

雲出本無心。擇棲多奇巘。繫子慕真勝。涉趣不知遠。初緣碧澗行。幾傍丹崖轉。林追去虎蹤。蹬躡飛猿踐。泉流遞淺深。巖谷變陰顯。歎瀑遇留憩。石牀時仰偃。桂芳洞裏秋。霞映山中晚。探異尋前期。入幽忘後反。神遊力不惰。理愜情俱遣。天路如可梯。欲以微官免。

皇甫冲

冲字子浚。長洲人。嘉靖戊子舉人。與弟洋。汾。濂。稱四皇甫。○吳中詩品。自高季迪徐昌穀後。應推皇甫兄弟。以造詣古澹。無一點穢纖之習。時二黃三張空存名目耳。

維摩寺雨坐

回嶺無仄徑。陟岡有夷壤。展睽入空濛。游心益昭朗。長風吹輕衣。飄搖翠微上。古寺迷夕煙。明燈淡綃幌。冥雨從東來。驚雷自西往。林巒忽不見。但聞山澗響。景寂非避喧。心瑩乃成賞。爲禮沉疴蹤。因之知幻象。

於巖石上眺東西兩湖

旭踐山中蹊。午憩巖上石。雲移石欲墮。雨霽蹊猶濕。倚策眺兩湖。波光渙相襲。東若旣紆青。西蘅亦凝碧。芙蓉落雙鏡。天影浮重壁。橋鳥有離聲。磯鷗無並翼。會茲物化情。感彼高深跡。從適得所遣。何爲苦拘迫。

皇甫汈

汈字子循。長洲人。嘉靖己丑進士。官至雲南按察僉事。○子循古體出入二謝。五言律亦在錢劉之間。與兄子安可云敵手。

秋夜把酒對月

宋玉陳九辯。陸機歌百年。悵茲清秋日。聊使幽懷宣。矯矯歸雲雁。嘒嘒含風蟬。摧芳委朝露。俄景流夕川。鱗運有代謝。薜華無長妍。始知行樂貴。何用居情牽。長夜思秉燭。新月正當筵。金尊泛綠醕。寶瑟絙朱絃。

商歌當棗下。楚舞出花前。餘名焉足藉。達生乃爲賢。

過武城言子祠作

朔風枉輕轍。戴星理扁轎。超忽之武城。有蕩瞻魯道。古邑一何卑。令猷久彌劬。絃歌謝清響。精華契深造。曰余廁文儒。耽寂違時好。剖符辭帝京。腰章宰名趙。諒乏操刀資。懼貽製錦誚。經過緬遐矚。神對宣幽抱。言采江上蘋。薦此廟中貌。誰謂千載殊。可以同高調。

奉答子安兄

江郭改故陰。家園藹新霽。柔條始發林。芳草漸紆砌。潘居信爲閒。楊亭况重閉。曰余忝明時。與子承嘉惠。分省各有讐。佐郡慚所莅。暫就北山招。轉愜東田稅。情忘桃李言。跡豈匏瓜繫。感遇興長謠。來章緬幽契。從軍行寄贈楊用修

思文際聖君。稽古萃羣辟。子雲侍承明。胡爲去荒域。被命事犀渠。差勝下蠶室。憤志酬八書。榮名重三策。丁年子卿嗟。皓首仲昇泣。看鷺窮瘴煙。放鷄定何日。業旣違操觚。勳遠期裹革。五月行渡瀘。千里望巴國。瀘水向東流。巴雲忽西匿。相思持寸心。願附雙飛翼。用修之才而謫戍邊微有情所共悲也。擬之馬遷子卿仲昇伏波幾於歌以當哭。

舟中對月書情

不識別家久。但看明月暉。關山一以鑒。驛路遠相違。影落吳雲盡。涼生楚樹微。天邊有烏鵲。思與共南飛。

九日寄子約

漫有登高興。兼當望遠何。對花驚白髮。見雁憶黃河。亂後書來少。霜前木落多。不堪羈宦日。同是阻干戈。

元夕熊子叔抑過集時謫遠州

國論何年定。鄉心此夕搖。雁飛天畔驛。龍隱日南橋。謫宦恩非薄。之夷路詎遙。誰憐梁傅淚。曾灑漢文朝。

寄劉諫議幾

欲將尺素遠相貽。疎懶無如與性宜。北虜塵飛榆塞日。西京灰滿柏梁時。中朝望屬陽司諫。左掖吟憐杜拾遺。定有封章回聖主。莫須焚草避人知。

廣寒宮登眺

寶閣凌霄建。珠窗映日開。月臨疑桂宇。露灑卽銅臺。山悉圖嶠入。池猶象漢迴。倚妝花屢發。窺舞鳥能來。傾國元因色。勞民豈但財。地隨胡運改。棟與美人摧。殷監良非遠。秦宮亦可哀。聖朝留故蹟。皇覽日休哉。

以前朝爲荒宴之戒。得杜老詠九成宮意。

對月答子浚兄見懷諸弟之作

南北何如漢二京。迢迢吳越兩鄉情。謝家樓上清秋月。分作關山幾處明。

唐順之

順之字應德。武進人。嘉靖己丑進士。官至僉都御史。天啓中追謚謏文。

登喜峯古城

時三衛貢馬散牧關外

絕頂孤峯見廢關。短衣落月試躋攀。三秋豹旅方乘障。萬里龍媒正滿山。候雁似隨鄉思去。寒花將送使臣還。籌邊迂薄真無補。空望伊吾抵掌間。

復官後報京師友人

姓名不復掛朝參。魚鳥由來性所耽。篋裏符經都已廢。山中藥草漸能諳。疎狂自分三宜黜。癩病其如七不堪。深謝故人推轂意。莫將陽羨比終南。

冬至南郊

明王敦大報泰時禮神君。位以南離正。宵從甲子分。月臨太乙館。星動羽林軍。除道疑登岱。鳴籥異度汾。聲容六變合。海岳百靈紛。封檢徵題字。屏帷悉畫雲。神光人共見。天語帝親聞。盛蹟誰能賦。多慙扈從羣。

陳

東字約之鄧縣人嘉靖己丑進士官至河南提學副使

咸寧山中雪霽晚行

雪霽乍見山。殘陽稍辭嶺。暝色起煙氛。寒光散墟井。田空獵火還。林凍棲鳥警。遙聞野寺鐘。初月生俄頃。都下秋雨夜。飲王子長宅。

闊別時何屢。蹉跎髮已侵。還朝明主賜。卜夜故人心。涼雨杯初覆。空堂漏欲沉。安知非夢寐。相對帝城陰。

黃省曾省曾字勉之吳縣人嘉靖辛卯舉人

江南曲

旖旎綠楊樓。儂傍秦淮住。朝朝見潮生。暮暮見潮去。有情而必盡言此詩味所以薄也。只此說住見言外有無限情事。

錢

嶸嶸字君望南通州人嘉靖壬辰進士歷官參議

憫黎詠

嘉靖戊申。崖吏失御。重以積蠹之餘。羣黎遂叛。攻掠城邑。遠近繹騷。撫者無策。漫以牛酒從事。越歲不戢。當路請命征討。予分典戎事。深悼誅夷之慘。用廣咨諏。卒藉天威。誅獲渠首。殲蕩醜類。總五千餘級。諸村悔過。悉歸順焉。庚戌夏四月三日。凱奏底定。追惟致寇有因。覆車當戒。感時述事。潛然有懷。

在昔邃古初。鴻濛闢天地。絕谷嶂南海。深簪鬱蒼翠。中有黎母居。伊人尙蒙昧。鑿井以飲渴。農田亦時藝。荒路隱匪通。幽局或交市。雖爾隔華界。猶紀王正歲。生黎若草木。榮隕隨和厲。熟黎若鳥獸。獫狁無智慮。所以古先聖。馭之以不治。

粵南本炎嶠。矧此瓊崖東。玄冬日且和。幽郊鮮陰風。花柳蔭廣隰。苗黍青芄芄。皇仁漸南極。草木均化工。豈獨茲黎人。物與非吾同。軍行值人日。感歎心沖沖。

朝發城東門。夕駐藤江壘。殺氣干層雲。狼師渡藤水。鷄犬皆震驚。人民盡奔徙。海避愁蛟蛇。山匿畏虎兕。蛇虎猶可虞。狼毒不可邇。軍令甚分明。顛仆何由弭。俗傳泣路衢。迸淚不能已。嗟哉一將功。豈獨萬國毀。海南無猛虎。而有麋與麋。玄崖產珍木。種種稱絕奇。斯物出異域。頗爲中國推。以茲重徵索。奔頓令人疲。窮年務采獵。爲官共饋儀。苦云近歲盡。無以充攜持。直欲訴眞宰。鏹此蘇民脂。物理有固然。忉怛令人思。葉落當歸根。雲沉久必起。黎人多良田。征斂苦倍蓰。誅求盡餘粒。尙象犢與豕。昨當租吏來。宰割充盤几。吏怒反索金。黎民那有此。泣向邏者借。刻箭以爲誓。貸一每輸百。腴削痛入髓。生當剝肌肉。死則長已矣。薄訴吏轉嗔。鎖縛不復視。黎兒憤勇決。挺身負戈矢。鎗急千人奔。犯順非得已。赫赫皇章存。今人棄如紙。朔風戒良節。赫赫張皇師。軍門號令嚴。震肅將天威。壯士快鞍馬。鋒鏃如星飛。一舉破賊壘。刀斧紛紆揮。剖尸越邱阜。踏血腥川坻。白日暗西嶺。瘴氣昏餘暉。魍魎墮我前。飢鳥逐人歸。征夫懷慘憂。涕泗霑我衣。黎人本同性。云何發禍機。神武貴勿殺。不在斬獲爲。息火當息薪。弭兵常弭飢。誰生此厲階。哲士知其非。治之以不治。取遠人之道也。徵求賁物。賦斂無藝。兵戎於是興矣。誰生風階。至今爲梗。末以弭飢爲救亂之本。是真能弭亂者。老成遠慮。可垂炯戒。後之柄國者。尙其敬而聽之。

尹耕耕字子莘蔚州人嘉靖王辰進士官至河南按察僉事坐劾戍遼左○子莘七言律本李空同派有秋篇曉角之聲。

秋興

薊門千里接雲中。燧火清宵警報同。合陣幾窺青海月。鳴鞭爭下黑山風。冬殘戰士衣仍薄。歲歉孤城廩